



KEMENTERIAN PEMBANGUNAN WANITA,
KELUARGA DAN MASYARAKAT

SIARAN MEDIA

DIALOG YAB TIMBALAN PERDANA MENTERI BERSAMA BADAN BUKAN KERAJAAN (NGO) ORANG KURANG UPAYA (OKU)

PUTRAJAYA, 26 JUN - YAB Dato' Seri Dr. Wan Azizah Dr. Wan Ismail, Timbalan Perdana Menteri merangkap Menteri Pembangunan Wanita, Keluarga dan Masyarakat telah mengadakan dialog bersama 50 pertubuhan badan bukan kerajaan (NGO) OKU kebangsaan dan 70 pertubuhan bukan kerajaan (NGO) OKU negeri pada 25 Jun 2019, semalam bertempat di Dewan Nur, KPWKM.

Tujuan utama sesi dialog ini diadakan adalah untuk mengetahui permasalahan yang dihadapi oleh OKU, serta untuk mendapatkan input berkaitan perancangan dan pembangunan OKU yang akan dibawa dalam Rancangan Malaysia ke 12 (RMK-12) yang akan datang.

Antara perkara yang telah dibincangkan adalah tentang isu aksesibiliti, penguatkuasaan tegas terhadap penyalahgunaan parkir OKU, peluang pendidikan kanak-kanak OKU, peluang pekerjaan kepada OKU, pindaan kepada Akta OKU 2008, peluang bersukan kepada OKU yang di sekolah, perumahan, insuran dan sebagainya.

Kerajaan mengambil inisiatif menerusi Majlis Negara Bagi Kerajaan Tempatan untuk menimbang dan bersetuju dengan penggunaan Pelan Tindakan Aksesibiliti Orang Kurang Upaya di bawah Aspek Persekitaran Fizikal sebagai panduan kepada penyediaan pelan tindakan aksesibiliti oleh setiap Pihak Berkuasa Tempatan (PBT). Selain itu, Kerajaan juga komited dan memberi tumpuan untuk memenuhi sasaran Dasar 1% OKU dalam perkhidmatan awam. Sebagai inisiatif terbaru 2 pusat *Independent Living Centre (ILC)* akan ditubuhkan pada tahun 2019 untuk memperkasakan OKU dan pada masa yang sama melakukan proses pengupayaan (*enablement*) dalam masyarakat.

KPWKM turut berharap program seumpama ini mampu meningkatkan hubungan di antara NGO OKU dan mewujudkan hubungan dua hala di antara agensi dan NGO terlibat dengan OKU untuk kerjasama strategik dalam memperkasa OKU.

Setakat 30 April 2019, seramai 540,986 OKU telah berdaftar dengan JKM. Oleh itu, KPWKM melalui JKM disamping agensi kerajaan lain sentiasa komited dalam usaha memastikan golongan OKU mendapat kesaksamaan hak dan peluang yang sama seperti anggota masyarakat yang lain dalam semua aspek kehidupan.

###

Disediakan oleh:

**Unit Perhubungan Awam
Jabatan Kebajikan Malaysia (JKM)
PUTRAJAYA
Tel: 03-8323 1745 / 1775/1773**